

**UKA13-imit atuutilersumik uranimik aamma aatsitassanik qinngornilinnik
píiaasarnermik attueqqusinnngilluinnarnerup atorunnaarsinnissaannik Inatsisartut
akuersissuteqarnissaannik Inatsisartut aalajangiussinissaannut siunnersuut
(Inuussutissarsiornermut Aatsitassarsiornermullu Naalakkersuisoq)**

pillugu

Aatsitassanut Ataatsimiititaliap

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

Aatsitassanut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Kim Kielsen, Siumut, siulittaasoq

Inatsisartunut ilaasortaq Gerhardt Petersen, Atassut, siulittaasup tullia

Inatsisartunut ilaasortaq Naaja Nathanielsen, Inuit Ataqtigiit

Inatsisartunut ilaasortaq Kuupik Kleist, Inuit Ataqtigiit

Inatsisartunut ilaasortaq Doris Jakobsen, Siumut

UKA2013-imi siullermeerinerup kingorna siunnersuut ataatsimiititaliamit misissorneqarpoq.

1. Siunnersuutip imarisai siunertaalu

Aalajangiiffigisassatut siunnersuutip qanoq kinguneqarnissaanik paasinninneq ersernerlulaartoq ataatsimiititaliamit maluginiarneqarpoq. Taamatut ersernerluttoqarnera ilaatigut Inatsisartut oqallinnerini arlalinni malunniuppoq, tamatumani siunnersuutip imarisaanik paasinninnerit assigiinngitsorpasuit oqaatigineqarmata. Inatsisartuni maanna aalajangerneqartussaq oqaluttuarisaanermut ilannguttussaasutut ataatsimiititaliamit isigineqarpoq. Taamaattumik taasinnermi qulequttap imarisavianik eqqortumik paasinninneq tunngavigalugu aalajangiisoqarnissaa ataatsimiititaliamit assut pingaartinneqarpoq.

1.1 Suna taasissutigineqassava

Tunngaviusumik aalajangigassap qulequtaa taasissutissaq naluneqanngitsutut ima oqaasertaqarpoq **“Uranimik aamma aatsitassanik qinngornilinnik píiaasarnermik attueqqusinnngilluinnarnerup” atorunnaarsinnissaannik**. Aalajangiiffigisassatut siunnersuut Inatsisartunit akuerineqassappat tamatuma pisortatigoortumik kingunerissavaa ujaasinermut píiaanermullu atatillugu aatsitassanut qinngornilinnut Kalaallit Nunaata killeqartitsiunnaarnera.

1.2 Suna taasissutigineqassanngila

Uranip aatsitassalluunniit qinngornillit allat taamaallaat saniatigut tunisassiarineqartussatut piiarneqarsinnaanissaannik qulequtaq taasissutissaq imaqaanngilaq. Taamaalilluni sammisaq tamanna Inatsisartuni taasissutigineqartussaannngilaq.

Kuannersuit imaluunniit aatsitassarsiornermi suliniutit aatsitassalluunniit allat aalajangersimasut ilimanaateqartulluunniit aalajangiiffigisassatut siunnersuummi tassani taasissutigineqassanngillat. Suliniutit taamaattut aallartinneqarsinnaaneranni Naalakkersuisut aalajangersimasumik naliliinerat tunngavigineqartariaqarpoq.

”Attueqqusinngilluinnarnermi” killiliussaqq annertusineqassanersoqq taasissutigineqassanngilaq. Taamatut killiliinissaqq qulequttami taasissutissami allassimanngilaq, taamaalillunilu Inatsisartuni taasissutigineqassanani.

2. Siunnersuutip Inatsisartuni siullermeerneqarnera

Siunnersuutip siullermeerneqarnerani siunnersuut piviusunngortinneqassanersoqq pillugu partiit isumaat imminnut ungasissorujussuummata ataatsimiititaliamit oqaatigineqassaaq. Isummat politikikkut imminnut taama akerleriitsigisut naapitinniarlugit ataatsimiititaliap maanna sulinerani periarfissaqaanngitsoqq ataatsimiititaliaq isumaqarpoq. Pissutsit taamaannerat ataatsimiititaliap isumaliutissiissutaani soorunami takuneqarsinnaassaaq. Taamaattumik tunngaviusumik aalajangernissamat politikikkut inassuteqaatitik isumaliutissiissummi matumani paartiit pingaarnertut saqqummiutissavaat, tassa siunnersuut piviusunngortinneqassanersoqq piviusunngortinneqassannginnersorluunniit pillugu ataatsimut oqariartuuteqarnissamat periarfissaqaanngimmat.

3. Apeqqutit

Ataatsimiititaliap siunnersuummik suliaqarnerani atorneqartussatut Inuussutissarsiornermut Aatsitassarsiornermullu Naalakkersuisoqq apeqqutinik akissuteqaqqullugu ataatsimiititaliamit qinnuigineqarpoq. Apeqqutit Naalakkersuisumillu akissutit isumaliutissiissummut matumunnga ilanngussatut ilanngunneqarput.

4. Naalakkersuisumik apersuineq

Ataatsimiititaliap siunnersuummik suliaqarnerani atorneqartussatut Inuussutissarsiornermut Aatsitassarsiornermullu Naalakkersuisoqq apersorneqarnissamat ataatsimiititaliamit aggersarneqarpoq. Apeqqutit Naalakkersuisumillu akissutit isumaliutissiissummut matumunnga ilanngussatut ilanngunneqarput.

5. Ataatsimiititaliap siunnersuummik suliarrinninera

Isumaliutissiisummi matumani imm. 2-p ataani aallarniutitut oqaaseqaatini ataatsimiititaliap innersuussutigissavai. Tunngaviusumik aalajangigassaq manna oqaluttuarisaanermut ilanngutissasoq ataatsimiititaliamit ataatsimut isigalugu isumaqatigineqarpoq, Inatsisartummi akuersissutiginninnerisigut aatsitassarsionermut suliassaqarfimmi periuseq ingerlanneqartoq atorunnaarsinneqassammat. Ataatsimiititaliaq taama naatsumik oqaaseqarluni siunnersuummut inassuteqaatini saqqummiutissavai.

6. Allannguutissatut siunnersuut

Siunnersuutip aappassaaneerneqarnissaanut Inuit Ataqtigiinnit Demokraatinillu allannguutissatut siunnersuummik saqqummiussisoqarpoq. Allannguutissatut siunnersuut tamanna isumaliutissiisummut matumunnga **ilanngussaq a**-tut ilanngunneqarpoq.

7. Ataatsimiititaliap inassuteqaatai

Ataatsimiititaliami amerlanerussuteqartut Siumumeersut Atassummeersullu **siunnersuut tamatut isikkoqartillugu akuerineqassasoq inassutigaat** aammalu siunnersuut pillugu oqaatigissallugu:

Uranimik aatsitassanillu allanik qinngornernik akulinnik attueqqusinnngilluinnarneq qulangersimaarinnittumik killilersuisumillu 1980-ikkut naalerneraniilli inissisimavoq, taamatutaaq ukiuni kingullerni arlaqalersuni politikikkut sulialinni innuttaasullu akornanni oqallisaavoq, maannalu apeqqut manna pillugu iliuseqarnissaq tullinnguuppoq.

Amerlanerussuteqartut qulakkeerlugu paasivaat Naalakkersuisuusimasut – Inuit Ataqtigiit, Demokraatit Kattusseqatigiit Paartiillu – september 2010-mi attueqqusinnngilluinnarneq siumoortumik atorunnaarsereersimagaat, Naalakkersuisooqatigiit taakku Kalaallit Nunaanni misissuinissamut akuersissutinut tunngaviusumik piunasaqaatinik allanngortitsigamik, piunasaqaatinik allanngortitsinermi aatsitassaqaassutsimik misissuineramik suliaqarlutik ingerlatseqatigiiffiit periarfissinneqarput piunasaqaataasumit annertunerusumik radiop qinngorneranik akulinnut misissueqqaarnissamik Aatsitassanut Ikummatissanullu Aqutsisoqarfimmut akuerineqaqqullutik qinnuteqarsinnaanngorlugit.

Amerlanerussuteqartut Naalakkersuisuusimasut periusersimasaanut oqaaseqaateqassanngillat, taamaattoq amerlanerussuteqartut toqqissisimanartippaat maanna Naalakkersuisuusut Inatsisartunut periarfissiimmata apeqqut pingaarutilerujussuaq oqaluuseritillugu, soorluttaaq amerlanerussuteqartunit naammagisimaarneqartoq uranimut aatsitassanullu allanut qinngornernik akulinnut attueqqusinnngilluinnarneq Inatsisartunit kiisami aalajangiinertalimmik isumannaarneqatussanngormat.

Amerlanerussuteqartut pisariaqarsoraat pissusissamisoortutullu isigalugu attueqqusinngilluinnarnerup atorunnaarsinneqarnissaa pillugu politikikkut tunngaviusumik isummertoqarnissaa, taamaaliornikkullu Naalackersuisut politikikkut suliaqarnissaannik piginnaatillugit, tamatumalu malitsigisaanik uranimut aatsitassanullu allanut qinngornernik akulinnut tunngatillugu Kalaallit Nunaata siunissami naalackersuinikkut aalajangiussai suliarineqarsinnaassammata.

Taamatuttaaq amerlanerussuteqartut iluarisimaarpaat Naalackersuisut ersarissumik nalunaarutigimmassuk attueqqusinngilluinnarnerup atorunnaarsinneqarneratigut salliutillugu siulliutillugulu isumannaarniarneqassasoq aatsitassat qaqutigoortut uraneqassutsimikkut qinngornernillu akoqassutsimikkut killiliussat qaangerlugit akulinnik ingerlatseqatigiiffiit aatsitassarsiornernik ingerlataqartut paaasinnaalernissaat.

Amerlanerussuteqartunitaaq innersuussutigineqarpoq aatsitassarsiornernik ingerlatsinissamut aaqqiissutissat tamarmik avatangiisit sillimaniarnissarlu pillugu najoqqutassat ilusilersorneqareermata aammalu ilusilersorneqartartussaallutik paaalernissamut qinnuteqartoqartillugu. Taamaaliortoqassaaq peqqissutsikkut-, isumannaallisaanikkut-, inuiaqatigiinnut- aamma avatangiisimut nammanneqarsinnaasumik ineriartortitsinissaaq qulakkeerumallugu.

Amerlanerussuteqartut nalunngikkaluarlugu Naalackersuisut Aatsitassanut Ikummatissanullu Inatsimmik maleruaanissaannik pisussaaffeqartut, amerlanerussuteqartunut pingaaruteqarluinnarpoq erseqqissassallugu amerlanerussuteqartut piunasaqaatigimmassuk qaqugukkulluunniit Aatsitassanut Ikummatissanullu Inatsimmi maleruaqqusat piunasaqaatillu apparneqanngilluinnassasut soorluttaaq amerlanerussuteqartut Naalackersuisunut kaammattuuteqassasut radiop qinngorneranik aatsitassanik akulinnut tunngatillugu akuersissutinik tunniussinermi piunasaqaatit sakkortusineqassasut.

Ataatsimiititaliami ikinnerussuteqartut Inuit Ataqtigiinneersut aappassaaneerinissamut allannguutissatut siunnersuummik saqqummiussaqarput, ikinnerussuteqartut **allannguutissatut siunnersuutip akuerineqarnissaa inassutigaa**t. Ikinnerussuteqartut **Naalakkersuisut siunnersuutaat itigartinneqassasoq** inassutigaaat aammalu siunnersuut pillugu ima oqaaseqaateqassallutik:

Aatsitassanik raadiup qinngornerinik akulinnik piiaaqqusinngilluinnarnerup atorunnaarsinneqarnissaani akoqassutsimut qaffasinnerpaaffiliisoqarnani aammalu saniatigut imaluunniit pingaarnertut tunisassiaassanersut apeqqutaatinnagu aatsitassanik uranimik thoriumimilluunniit piiaanissaq avammullu tuniniaanissaq pineqarmat maanna ersarilluinnartumik paasinarsivoq. Aamma aatsitassat raadiup qinngornerinik akullit piiarneqarnissaannut aatsitassanut qaqutigooortunut akuussanersut piumasaqaataannngilaq. Ilaatigut Inatsisartunit Naalakkersuisunillu aalajangiisussanit ersernerluttumik oqariartuuteqartoqarnera pissutigalugu paatsuinerit taakkorpiaat oqallinnermi eqqartorneqaralarput.

Paatsuinerit taakku allallu oqallinneq sunnerpaat aammalu paatsuunganermik toqqissisimannnginnermillu pilersitsillutik. Taamaattumik piiaaqqusinngilluinnarnerup atorunnaarsinneqarnissaa pillugu nuna tamakkerlugu innuttaasunik taasisitsinissamk siunnersuut ataatsimiititaliami amerlanerussuteqartunit itigartinneqarmat Inuit Ataqtigiinnit assorsuaq naammagineqannngilaq. Apeqqut taama tunngaviusumik inissisimalluinnartigisoq pillugu innuttaasut oqaaseqarnissaat periarfissinneqartariaqaralarpoq.

Innuttaasunik taasisitsinissaq sioqqullugu partiinut aammalu arlaannaanulluunniit attuumassuteqanngitsumik sammisaq pillugu paasititsiniaasoqassasoq Inuit Ataqtigiinnit erseqqissumik kissaatigineqarpoq. Taamatut paasititsiniaanermi oqaatsit tamanit isummerfigineqarsinnaasut paasineqarsinnaasullu aallaavigineqarnissaat pingaaruteqarpoq. Inuit Ataqtigiit assersuutigalugu isumaqarput aalajangiinissamut tunngavigisat naammannngitsut, tassami atortussat ilarpassui tuluit oqaasii atorlugit allagaammata aammalu oqaatsit teknikimut allaffissornermullu attuumassuteqarlutik. Tamatuma saniatigut Naalakkersuisut paasititsisarnerminni interneti kisiat toqqammavigaat. Taamaalilluni innuttaasut amerlasuut paasissutissanik pissarsiniarsinnaajunnaarsillugit. Inuit Ataqtigiit erseqqilluinnartumik isumaqarput piiaaqqusinngilluinnarneq annikitsuinnarmik tunngaveqarluni atorunnaarsinneqassasoq.

Inatsisartuni partiit naapeqatigiissinnaanermut ammanissaat Inuit Ataqtigiit naggatissaa tikillugu neriuutigaluarpaat. Taamaattoqannginnera nassuerutigisariaqarparput. Taamaalilluni amerlanerussuteqalaaginnartunik aammalu innuttaasunik, taakku politikikkut inissisimanagerat apeqqutaatinnagu, apeqqummut isumaqataannngitsunik tunngaveqarluni piiaaqqusinngilluinnarneq atorunnaarsinneqassaaq. Martsimi qinersinermi piginnaatitsissut tunniunneqartoq Naalakkersuisut naalakkersuisooqatigiillu sinnerlugu iliuseqartut Inuit Ataqtigiit isumaqarput. Tamanna naammagittaalliutigiuaavarput. Tassami aalajangiineq

tamanna oqaluttuarisaanermut taamaallaat ilaangilaq. Aamma avatangiisigut ukiuni hundrelippassuarni, taamaalillunilu siunissami kinguaariippassujussuarni avatangiisigut sunniuteqarfigissavai. Aatsitsitassanik piiiaanermut eqqagassat qinngornernik akullit nunatsinni inissineqartalerpata kingumut utersaarsinnaajunnaariissaagut.

Aalajangikkap tamatuma oqaluttuarisaanermut ilaasussaanera aammalu siunissami avatangiisitsinnut, peqqissusitsinnut, nunatta politikiaata nunarsuarmi inissisimaneranut, isumannaallisaanermi pissutsinut aningaasaqarnitsinnullu annertuumik sunniuteqartussaanera pissutigalugu aalajangiinissamut piffissaqartitsilluartoqarnerusariaqaraluarpoq. Aalajangigassamik taama pingaaruteqartigisumik piffissaq taama sivikitsigisoq atorlugu tuaviuunneqartumik allamik pisoqarsimanngisaannarpoq. Inatsisartut siunnersuut ulloq 10. oktober siullermeerpaat. Siullermeerinerup nalaani Inatsisartunut ilaasortat arlallit siunnersuutip kingunerisassai paasisimanngikkaat paasineqarpoq. Sapaatip akunnerani kingullermi Aatsitassarsiornermut Naalakkersuisup nuna tamakkerlugu TV-kkut oqaatigaa urani saniatigut tunisassiarineqartussaq kisimi siunnersuummi pineqartoq. Kukkuneq tamanna suli naqqinneqanngilaq. Siullermeerinerup kingorna ullut 11-iinnaat kingorna Aatsitassanut Ataatsimiititaliaq isumaliutissiisumik tunniussaqqarpoq. Taama nukingertoqartigisoqarnera Naalakkersuisunit naalakkersuisoqatigiinnillu tunngavilersorneqanngilaq. Nassuiaatigineqartutuaq tassaavoq inuit sammisamik suliaqartut nalunaarusiat pigineqartut imarisaannik puiguinnginneranni piiaanngilluinnarnissap atorunnaarsinneqarnissaa pingaaruteqartoq (tak. Naalakkersuisut allakkatigut akissutaanni apequt 18-imut akissut). Tamanna nukingiussilluni suliarinninnermut tunngavilersuutigissallu immini annikippallaarsorinarpoq.

Aamma urani pillugu danskit-kalaallillu nalunaarusiaata teknikikkut nassuiaatigineqarnissaanik Inuit Ataqtigiit kissaataat Naalakkersuisunit itigartinneqarmat tupannarpoq. Danmarkimi Folketingi teknikikkut taama nassuiaaffigineqarsimagaluarput. Inatsisartunut ilaasortat danskinit qinikkanit ajornerusumik inissinneqarnerat ataqqinninnginnertut Inuit Ataqtigiinnit isigineqarpoq. Tamanna akuerineqarsinnaanngilaq.


Naggasiutigalugu Inuit Ataqtigiinnit oqaatigineqassaaq isumaqatigiissutit atuutsinneqalernissaat inatsisinillu iluarsinissaq eqqarsaatigalugit sorpiaat iliuuserineqarnissaat Naalakkersuisunit ataatsimut isigalugu ilisimaneqanngimmat assorsuaq assuarigatsigu. Soorluttaaq allaffissorneq aammalu pisortat oqartussaaffeqarfiinik nutaanik pisariaqartitsineq eqqarsaatigalugu piiiqaqusinngilluinnarnerup atorunnaarsinneqarnissaa qanoq sunniuteqassanersoq ilisimaneqanngitsoq. Aatsitassat raadiup qinngornerinik akullit immikkut ulorianaateqartutut isigiumaneqanngittuarnerat piviusorsiuunngitsutut isigaarput, tassami isumaqatigiissutinik inatsisinillu naleqqussaanissatsinni tamani aatsitassat raadiup qinngornerinik akullit immikkut navianaateqartut innersuussutigineqarmat. Aalajangikkap Inatsisartuni amerlanerussuteqalaaginnartunit maanna aalajangerneqartussap qanoq annertutigineranut tamanna akerliullunilu paasinninnginnermut takussutissaavoq.

Tamanna tunngavigalugu siunnersuut itigartinneqassasoq Inuit Ataqatigiit inassutigaat aammalu amerlanerussuteqartut isummaminnik allannguinnissaat aammalu minnerpaamik innuttaasunik tikkuussisuusumik taasisitsineq aqputigalugu innuttaasut isummeqqullugit kaammattuutigeqqullugu.


Taama oqaaseqarluni aammalu isumaliutissiissummi oqaatigineqartutut paasinnilluni ataatsimiititaliap siunnersuut aappassaaniigassanngortippaa.



Kim Kielsen
Siulittaasoq



Gerhardt Petersen
Siulittaasup tullia



Doris Jakobsen



Naaja Nathanielsen



Kuupik V. Kleist



Bilag A

EM 2013/106

Ulloq 24. oktober 2013

Allannguutissatut siunnersuut

**Saqqummiunneqartup UKA 2013/106-ip imaattunik oqaasertallip
aappassaaneernejarluni oqaluuserineqarnerani.**

**“UKA13-imit atuutilersumik uranimik aamma aatsitassanik qingnornilinnik
paaasarnermik attueqqusinnigilluinnarnerup atorunnaarsinnissaannik
Inatsisartut akuersissuteqarnissaannik Inatsisartut aalajangiussinissaannut
siunnersuut.”**

Inatsisartut suleriaasiaanni § 34, Imm. 2 naapertorlugu matumuuna imaattumik
allannguutissatut siunnersuuteqarpugut:

Allannguutissatut siunnersuut imaattunik oqaasertaqarpoq:

**Atortussiassanut qingnornernik ulorianartunik akulinnut atatillugu
akuersaangilluinnarnissamik politikkeqarnerup atorunnaarsinneqarnissaa
pillugu aalajangiisoqartinnagu tikkuussisumik nuna tamakkerlugu inunnik
taasititsisoqarnissaanik Naalakkersuisut sulissuteqaqqullugit
aalajangiiffigisassatut siunnersuut. Inunnik taasititsisoqartinnagu
sioqqutsisumik nalunaarusiat paasissutissallu arlaannaannulluunniit
attuumassuteqanngitsut toqqammavigalugit nuna tamakkerlugu
piffissaqarluarluni paasititsiniaasoqassaaq inuiaqatigiinni qaammarsaanermik
oqallinnermillu ingerlatsisoqarnissaa siunertaralugu. Taasititsinerup inernera
tamatuma kingorna Inatsisartuni aalajangiivigineqassaaq.**

(Inuit Ataqatigiit Demokraatit-llu Inatsisartuni ilaasortaataat)

Tungavilersuut

Akuersaangilluinnarnissamik politikkeqarnerup atorunnaarsinneqarnissaa inuiaqatigiit
akornanni, aammalumi aalajangiisartut nunallu inuisa akornanni, annertuumik oqallissu-
taavoq. Oqallinnermi erserpoq atorunnaarsitsinissap kingunissai pillugit aalajangiisartut
nunallu inuisa akornanni paatsoornerit nalorninerillu ingerlaartut.

Nunap inoqqaavisa pisinnaatitaaffii pillugit Naalagaaffiit Peqatigiit nalunaarutaanni Imm.
32, stk.2-mi erseqqissumik allassimasoqarpoq suliniummik sumilluunniit nunaan-nik
nunanillu najugaannik attuisumik isumalluutinilluunniit allanik attuisumik akuersissu-
teqannginnermi inuiaat pineqartut kiffaangissuseqartumik, sioqqutsisumik aamma paa-
sinnilluni akuersineq anguniarlugu isumasiorneqaqqaartassasut. Aalajangerniarnermi
ingerlatsineq Naalakkersuisut atussallugu aalajangiussimasaat pisinnaatitaaffimmut tas-
sunga naapertuutinnilaq. Taamaammat Inuit Ataqatigiit siunnersuutigaarput tungavi-
usumik isumamut aamma tassunga eqqortitsisinnaaqqulluta innuttaasut aalajangerniar-
nermi peqataatinneqassasut.

Qaammatip kingulliup ingerlanerani paasissutissarpasuit saqqummiussorneqarput Inatsisartunut ilaasortat isummerfiginiagassaat. Paasissutissat tamakku tamarmik inuiaqatigiinnut tamanut anngunneqartariaqaraluarput imarisaannik saqqummiivigineqarnissaminut oqallissuteqarnissamullu piffissalernerqartariaqartunut. Akuersaanngilluinnarnissamik politikkeqarnerup atorunnaarsinneqarnissaa kissaatigineqassappat taava isummerfigissat qanoq inissisimani tamaasa salliutillugit oqallisigineqartariaqarput.

Akuersaanngilluinnarnissamik politikkeqarnermik atorunnaarsitsinerup kingunerissavaa Kalaallit Nunaat tassaalissammat nuna uranimik nioqqutissiorfiullunilu uranimik avammut tunisassiortoq. Aalajangerneq tamanna oqaluttuarisaaneq eqqarsaatigalugu imaannaanngitsussaq inuiaqatigiinni sorlaqartariaqarpoq inuiaqatigiillu piginnaatissummik erseqqissumik tunniussineratigut pilluni.



20. oktober 2013

**Sapaammi 20. oktober nal. 10.00 ML nr. 2-imi isumasioqatigiilluni
ataatsimeeqatigiinnissamut Aatsitassanut Ataatsimiititaliap
apeqqutaannut akissuteqaat.**

1. "Uranimik piiaanissamik akuersaanngilluinnarnerup"
atorunnaarsinneqarneratigut uranip thoriummilluunniit saniatigut tunisassiatut
imaluunniit pingaarnertut tunisassiatut aatsitassarsiornermi suliniutini akuunerat
apeqqutaajunnaassasoq ilumoorpa?

Apeqqummut 1-imut akissut:

*Aatsitassanik qaqutigooortunik amerlanertigut uranimut aamma/imaluunniit
thorium-imut atasuusartunik piiaasinnaanisa qulakkeerneqarnissaa
Naalakkersuisut akuersaanngilluinnarnissamik politikkeqarnerup
atorunnaarsitsinissaannut siunertaavoq.*

*Uranimik peqarfiit niuerutigineqarsinnaasut ilisimaneqartut aatsitassanut
qaqutigooortunut atasuupput. Taamaattumik uranimik akuutitsiviusumik
aatsitassarsiorfimmik ingerlatsinissamik qinnuteqaatip suliasamat uranimik
saniatigut tunisassiorfiusussamat tunngassuteqassasoq
naatsorsuutigineqartariaqarpoq.*

*Uranimik ilaqartumik aatsitassarsiorfimmik ingerlatsinissamik
piviusunngortitsisoqassappat pisuni tamaginni, aatsitassarsiorfimmik
ingerlatsinerup isumannaatsumik ingerlanneqarsinnaanissaata
qulakkeerneqarnissaa siunertaralugu VVM-imik aamma peqqinnissamik
misissuinernik annertuunik suliaqartoqartoqartussaavoq.*

*Taamatutaaq uranimik suliaqarnermut aamma avammut annissuiner
atatillugu, maleruagassat tamarmik safeguards-inut aamma avammut
annissuiner
nakkutiginninnermut tunngassuteqartut malinneqarnissaat
qulakkeerneqassaaq.*

1.a. Qupp. 2/12-imi oqaatigineqarpoq uran tassaasoq aatsitassanut
qaqutigooortorianut atatillugu saniatigut tunisassiaasoq. Aatsitassanut
qaqutigooortunut atatillugu tamaattoqartuaannarnerasoq itisilerneqassasoq
ataatsimiititaliamit kissaatigineqarpoq –tassunga attuumassuteqanngitsunik

Kalaallit Nunaanni aatsitassaqaarpa?

Apeqqummut 1a-mut akissut:

Aatsitassanik qaqutigoortunik peqarfeqarsinnaavoq, uranimik akoqarnera nalinginnaasumik pinngortitamiittartut annertussuseqartunik. Assersuutigalugu Kalaallit Nunaata kujataani Killavaat Alannuanni peqarfimmi taamaattoqarpoq.

2. Aatsitassanik raadiup qinngornerinik akulinnik ujaasinissamut atorluannissamullu akuersissuteqartoqartillugu Inatsisartut siunnersorneqarnatilluunniit aperineqassanngitsut Naalakkersuisunit uppersaqquneqarpoq?

Apeqqummut 2-mut akissut:

Aatsitassanut ikummatissanullu inatsimmi allassimavoq, sumiiffimmi erseqqinnerusumik killissalersorneqartumi atugassarititaasut erseqqinnerusumik aalajangersarneqartut tunngavigalugit aatsitassanik ataatsimik arlalinnilluunniit misissuinissamut paaanissamullu kisermaassisussaataalluni akuersissummik Naalakkersuisut tunniussinnaasut. Akuersissut immikkut misissuinissamut taamatullu paaanissamut tunniunneqarsinnaavoq.

Aamma aatsitassanut ikummatissanullu inatsimmi allassimavoq, pissutsit inuiaqatigiinnut imaluunniit avatangiisinut annertuumik sunniuteqarsinnaasut pillugit suliassanut tunngatillugu, suliassani aalajagiinnginnermi Naalakkersuisut Inatsisartuni ataatsimiititaliaq attuumassuteqartoq ilisimatissagaat

3. "Uranimik paaanissamik akuersaanngilluinnarnerup" atorunnaarsinneqarsinnaanerata kingorna uranimik thoriumimilluunniit paaanermut atatillugu maleruagqusanik sukannernerunerusunik Naalakkersuisut oqaasertalersuilersaarnersut oqaasertalersuilersaannginnerisulluunniit Naalakkersuisunit uppersaqquneqarpoq, tamanna akissuteqaammi erseqqissumik allaassimangimmat?

Apeqqummut 3-mut akissut:

Akuersaanngilluinnarnissamik politikkeqarnerup atorunnaarsinneqarnissaanut Inatsisartut tapersiinerat Naalakkersuisut angussappassuk, piumasaqaatit maleruagassallu kiisalu isumalluutissat pisariaqartinneqartut suliassaqaarfimmi tassani isumannaatsumik ingerlataqarnerup qulakkeerneqarnissaanut pisariaqartut aalajangersarnissaannut ingerlaqqissaagut.

Uranimik paaanerup aamma avammut annissuinerup immikkoortuini tamaginni alapernaarsuinissamik nakkutiginninnissamillu qulakkeerinissamut nunani tamalaani maleruagassat periaatsillu annertooujussuit inerisarneqareerput. Tamatuma saniatigut uranimik suliarinninneq, assersuutigalugu Canada-mi peqqinnissakkut avatangiisitigullu isumannaatsumik ingerlanneqarpoq. Soorunami nunani allani maleruagassat suleriaatsillu isumassarsiorfigissavagut.

3a Tak. qupp.4/12. Aatsitassanik suliniutinut uranimik thoriumimilluunniit saniatigut tunisassiorfiusunut pingaarnertulluunniit tunisassiorfiusunut London Miningimut akuersissummut assingusumik "immikkoortumut akuersissuteqartoqassava"? Ingerlatseqatigiiffiit aningaasalersuinissamut periarfissaat siuarsarniarlugit? Ingerlatseqatigiiffinnut aatsitassanik raadiup qinngornerinik akulinnik pingaarnertut saniatigulluunniit tunisassiorfiusunut piunasaqaatit sukannernerusut immikkoortumut akuersissummi ilaatinneqassappat?

Apeqqummut 3a-mut akissut:

Akuersissutinut ilusiliat suleriaaserineqarput pitsaasut ukiorpassuarni atorneqarsimasut, aammalu aatsitassanut ikummatissanullu inatsimmi 16-ip ataani paaanissamut akuersissutinik tunniussinermut atatillugu siunissami Naalakkersuisut aamma atussamaarpaat.

Aatsitassarsorfinnut suliassanut atatillugu avatangiisinut, isumannaallisaanermut peqqinnissamullu piunasaqaatit §§ 19, 43 aamma 86 naapertorlugit akuersissuteqarnernut atatillugu aalajangersarneqarajuttarput.

Aatsitassanut qinngornernik ulorianartunik akulinnut tunngatillugu taakkua peqarfimmi akuutillugit isumannaallisaanermut, peqqinnissamut avatangiisinullu atatillugu piunasaqaatinik immikkuullarissunik aalajangersaasoqartassaaq.

Akuersaanngilluinnarnissamik politikkeqarnerup atorunnaarsinneqarnissaa Inatsisartut akuerissappassuk, Naalakkersuisut oqaatigineqareersutut piunasaqaatit maleruagassallu kiisalu isumalluutissat pisariaqartinneqartut suliassaqarfimmi tassani isumannaatsumik ingerlataqarnerup qulakkeerneqarnissaanut pisariaqartut aalajangersarnissaannut ingerlaqqissapput. Maleruagassat oqaatigineqartut sorliit pitsaanerpaatut naliliiffigineqarnersut suli isummerfigineqanngilaq.

4. Canadami Australiamilu atortussanik raadiup qinngornerinik akulinnik paaanermut atatillugu maleruagassat atorneqartut ilaat ataaseq tamaasaluunniit atorniarneqarnersut Naalakkersuisut uppersarsinnaavaat? Maleruagassanut sukannernerusunut immikkut ittumik pilersaaruteqartoqarnersooq erseqqissaatigineqassasoq kissaatigineqarpoq?

Apeqqummut 4-mut akissut:

Oqaatigineqareersutut piunasaqaatit maleruagassallu kiisalu isumalluutissat pisariaqartinneqartut suliassaqarfimmi tassani isumannaatsumik ingerlataqarnerup qulakkeerneqarnissaanut pisariaqartut aalajangersarnissaannut Naalakkersuisut ingerlaqqissapput. Maleruagassat oqaatigineqartut sorliit pitsaanerpaatut naliliiffigineqarnersut suli isummerfigineqanngilaq.

Aammaloortumik erseqqissarneqassaaq tunngaviummik aalajangernissaq

pineqarmat.

5. "Pisinnaatitaaffinnik pigisallit" aatsitassanik niuerutiginiissaannut soqutiginaatilinnik paasisimasanik upparnarsaareerunik piaanissamut akuersissummik pissarsisinnaataassasut pillugu isumartik erseqqissaqqullugu Naalackersuisut qinnuigineqarput. Avatangiisinut navianartoqannginnera pillugu ilaatigut VVM-ikkut qularnarunnaarsitsisoqaraangat piaanissamut akuersissummik aatsaat tunniussisoqassasoq ataatsimiititaliamit ilimagineqarpoq. Erseqqinnerusumik oqaatigalugu: Pisinnaatitsissumik pigisalik ujaasinissamut akuersissuteqartoq aammalu taanna aqputigalugu uranimik piiarneqarsinnaasumik imminut akilersinnaasumik nassaartoq piaanissamut pisortatigoortumik akuersissummik pisinnaatitaava?

Apeqqummut 5-mut akissut:

Aatsitassanut ikummatissanullu inatsimmi allassimavoq, pisinnaatitsissummik pigisaqartoq misissuinissamut akuersissutip ataani piaanissaminik pilersaarfigisaminik peqarfinnik niuernermik tunngaveqartumik piiarneqarsinnaasutut paasisaqarsimasoq killissalersuisimasorlu, aammalu atugassarititaasunik akuersissummi allassimasunik allatigut naammassinnissimasoq, piaanissamut akuersissummik tunineqarnissamik pisinnaatitaasoq.

Atugassarititaasut naammassineqarsimassasut piunasaqaataassaaq, ilanngullugit piiaaneq isumalluutitigut, isumannaallisaanikkut avatangiisitigullu isumannaatsumik pisinnaasoq.

5.a Piunasaqaatinut nalinginnaasunngorsakkanut tapiliutit 709-711 ilanngunneqartut Naalackersuisut akissumminni oqaatigaat. Tapiliutit taakku ulloq suna ilanngunneqarsimanersut oqaatigeqquneqarpoq?

Apeqqummut 5a-mut akissut:

Atugassarititaasussat nalinginnaasut Naalackersuisut ulloq 9. september 2010 ataatsimiinneranni nr. 110-imi akuersissuteqarfigineqarput.

6. Aatsitassarsiornermi suliniutit qassit aatsitassanik qaqtigoortunik akoqarnersut aammalu raadiup qinngornerinik akoqarnerat pissutigalugu nasaanit taakkunanit qassit ullumikkut piiaarneqarsinnaannginnersut pillugu normulersukkamik nalunaarsuisoqassasoq qinnutigineqarpoq?

Apeqqummut 6-mut akissut:

Naalackersuisoqarfik naliliivoq suliassani matuma kinguliani allassimasuni ullumikkut piiaasoqarsinnaanngitsaq:

1. Kuannersuit akuersaanngilluinnarnissamut naleqqiullugu qaffasippallaamik uranitaqarput aamma thorium-itaqarlutik.
2. Sarfartoq aatsitassanik qaqtigoortunik peqarfeqarpoq aamma niobium-

imik peqarfeqarluni. Aatsitassat qaqutigoortut thorium-imik qaffasippallaamik akoqarnertik pissutigalugu piiarneqarsinnaanngillat aammalu niobium-imik peqarfiit uranimik qaffasippallaamik akoqarnertik pissutigalugu piiarneqarsinnaanatik. Niobium aatsitassanut amigaataasunut ilaavoq.

3. *Qeqertaasaq aatsitassanik qaqutigoortunik aamma niobium-imik peqarfeqarpoq akuersaanngilluinnarnissamut naleqqiullugu thorium-imik qaffasippallaamik akoqartunik.*
4. *Tikiussaq aatsitassanik qaqutigoortunik aamma niobium-imik peqarfeqarpoq akuersaanngilluinnarnissamut naleqqiullugu thorium-imik qaffasippallaamik akoqartunik.*
5. *Niaq aatsitassanik qaqutigoortunik peqarfeqarpoq akuersaanngilluinnarnissamut naleqqiullugu thorium-imik qaffasippallaamik akoqartunik.*
6. *Milne Land aatsitassanik qaqutigoortunik peqarfeqarpoq akuersaanngilluinnarnissamut naleqqiullugu thorium-imik qaffasippallaamik akoqartunik.*
7. *Motzfeldt Sørensen resources narsarsuaq aatsitassanik qaqutigoortunik aamma niobium-tantal-imik peqarfeqarpoq akuersaanngilluinnarnissamut naleqqiullugu uranimik aamma thorium-imik qaffasippallaamik akoqartunik. Pisumi tassani peqarfimmut tassunga paasissutissat amerlanerusut amigaataapput. GEUS-itoqqami paasissutissanut naleqqiullugu urani kisiat eqqarsaatigigaanni peqarfik piiarneqarsinnaassaaq. Kisiannili qillerinerit nutaat paasinarsisippaat uranimik aamma thorium-imik akoqarnera akuersaanngilluinnarnissamut qaffasinnerusoq. Niobium-tantal aatsitassanut amigaataasunut ilaavoq.*

7. Immikkut ilisimasalinnit avataaneersunit siunnersorneqarnissaq tamat oqartussaaqataaneranni tunngavigisanut akkerliunerarlugu Naalakkersuisut oqaatigimmassuk tamatumani tamat oqartussaaqataaneranni tunngavigisat sorlerpiaat eqqarsaatigineqarpat? Aammattaaq siunnersuutip suliarineqarneranut atatillugu immikkut ilisimasalinnit avataaneersunit aalajangersimasumik siunnersorneqartoqarsimanersoq paasissutissiissutigineqassasoq qinnutigineqarpoq. Immikkut ilisimasallit avataaneersut atornerqarnerat pitsaanngitsumik kinguneqassava?

Apeqqummut 7-mut akissut:

Akissummi siullermi paasissutissiissutigineqarpoq:

”Uranimik allanillu qinngornernik ulorianartunik akulinnik piiaanissamut ”Akuersaanngilluinnarnissap” atorunnaarsinnissaanut UKA13-miit atuutilersumik Inatsisartut akuersinissaat pillugu Inatsisartut aalajangiiffigisassaattut siunnersuut” tassaavoq politikkikkut tunngaviusumik aalajangernissaq. Siunnersuutip suliarineqarnera sioqqullugu qulequtaq, aamma nalunaarusiani nassuiaasianilu arlalinni paasinarsisinneqartarsimasoq, pillugu ukiorpassuarni tamanut ammasumik oqallittoqarpoq. Tamanna tunngavigalugu

Naalakkersuisut naalakkersuisutut immikkut piginnaatitaaffeqarnertik aammalumi politikikkut iliuseqarnissamut pisussaaffeqarnertik atorpaat. Naalakkersuisut naalakkersuisutut tunngaviusumik pisinnaatitaanernik taakkuninnga atuinermi Naalakkersuisut aatsaat avataaneersunik immikkut ilisimasalinnik oqaloqateqaqqaarlutik iliuseqarniassappata, tamanna inuiaqatigiinni oqartussaaqataaneranut tunngaviusunut akerliusussaavoq”.

*Tassalu avataaniit immikkut ilisimasalinnik oqaloqateqarneq inuiaqatigiinni oqartussaaqataaneranut tunngaviusunut akerliusoq Naalakkersuisut oqanngillat. Naalakkersuisut oqarput, Naalakkersuisut **aatsaat** immikkut ilisimasalinnik avataaneersunik oqaloqateqaqqaarlutik iliuseqarsinnaassappata tamanna inuiaqatigiinni oqartussaaqataaneranut tunngaviusunut akerliusussaasoq. Politikikkut iliuseqarnissaq aammalu Naalakkersuisut politikianut ilaasunut siunnersuutini saqqummiussisarnissaq Naalakkersuisut inuiaqatigiinni oqartussaaqataanikkut pisinnaatitaaffigaat. Naalakkersuisut paasinninnerat malillugu politikikkut siunnersuutit saqqummiunneqarsinnaalernissaannut immikkut ilisimasallit akuserseqqaartassappata, tamanna inuiaqatigiit oqartussaaqataanerannut naapertuutissanngilaq.*

Naalakkersuisut immikkut ilisimasalinnik akuttunngitsumik atuisarput. Tamanna assersuutigalugu aamma 2008-imi urani pillugu nassuiaatinut atatillugu pivoq. GEUS aamma DMU 2010-imi urani pillugu naqitaminnik tamanut saqqummersitsimmata tamanna pivoq.

8. Uranimik piiaanissamik akuersaanngilluinnarnerup atorunnaarsinneqarnera uranip thoriumilluunniit saniatigut tunisassiarineqarsinnaanerisa akuerineqarnissaanut Naalakkersuisunit atorneqalersaartoq ”Uranimik piiaanissamik akuersaanngilluinnarnerup” atorunnaarsinneqarnissaa pillugu saqqummiussissummi kaammattuutini allassimavoq. Tamanna siunnersuutip taasissutigineqarnissaanut qulequttami allassimanngilaq. Uranimik piiaanissamut akuersaanngilluinnarnerup atorunnaarsinneqarnissaani tamanna Naalakkersuisut politikikkut anguniagarippassuk apeqqutip tamatuma taasinermit qulequttamut nalunaarneqarnissaa eqqornerussannginnerluni?

Apeqqummut 8-mut akissut:

Naalakkersuisut uteqqissavaat oqaaseqatigiiliornera allaanerussasoq isumaqatigineqanngimmat. Akuersaanngilluinnarnissamik politikkeqarnerup ersarissumik atorunnaarsinneqarnissaa pingaaruteqarpoq.

Atorunnaarsitsinermit tassani aatsitassanut qaqutigooortunut tunngatillugu suliassat ilai ullumikkut akuersaanngilluinnarnissamik politikkeqarnermit uninngatinneqartut ingerlateqqissinnaalernissaat ajornarunnaartussaavoq.

Siusinnerusukkut ilisimatitsissutigineqareersutut Kalaallit Nunaanni uranimik peqarfinni niuerutigineqarsinnaasutut ilisimaneqartuni urani aatsitassanut qaqutigooortunut atatillugu saniatigut tunisassiassaavoq.

9. Canadami USA-milu imaluunniit nunani allani EUROATOM-imik isumaqatigiissuteqartuni uranimik akoqassutsimut annerpaaffissamik atuutsitsisoqarpa?

Apeqgummut 9-mut akissut:

Oqaatigineqareersutut Naalackersuisut akuersaanngilluinnarnissamik atorunnaarsitsinissaq akuerissappassuk maleruagassanik suleriaatsinillu suliaqarnerup aallartinnissaa Naalackersuisut pilersaarutigaat. Naalackersuisut tassunga atatillugu maleruagassat pitsaanerpaat nassaariniarlugit maleruagassat attuumassuteqartut misissussavaat. Nunat ataasiakkaat maleruagassaat sukumiisumik sulii Naalackersuisut misissunngilaat, pissutigalugu suliaqarneq taanna tunngaviusumik aalajangernerup pereernerani ingerlanneqartussaammat.

Akuissusissat il.il. pillugit maleruagassanut tunngatillugu ilisimatitsissutigineqarsinnaavoq assersuutigalugu naliusunut killissaliussaqqarmat EURUATOM-ip Safeguards-iini maleruagassat qaqugukkut atorneqassanersut aalajangersagaqarluni.

Tassunga atatillugu taaneqarsinnaavoq Commission Regulation (Euratom) No 302/2005 of 8 February 2005 on the application of Euratom safeguards - Council/Commission statement, uranimik uninngasuutigineqartut oqimaassusaannik nalunaarutiginninnermi atorneqartartut. Taamaalluni assersuutigalugu urani 0,01-imit (1 %) annertunerusumik annertunermillu akuissuseqartoq qanoq nalunaarutigineqartassanersoq maleruagassaqqarpoq.

Aamma allanik maleruagassaqqarpoq assersuutigalugu uranip saffiugassartaanik il.il. avammut annissuineranut tunngassuteqartunik.

10. Uranimik avammut tuniniaanermut atatillugu oqartussaanerup agguataarneqarnissaa pillugu Danmark aamma Kalaallit Nunaat suleqatigiinnissamik isumaqatigiissuteqarsinnaanngippata qanoq iliortoqassava? Tassunga atatillugu nunat qanoq annertutigisumik iliuuseqarsinnaappat – assersuutigalugu Danmarkip toqqaannartumik kissataanut akerliusumik Kalaallit Nunaat uranimik avammut tunisaqarsinnaava?

Apeqgummut 10-mut akissut:

Uranimik avammut annissuineranut atatillugu nunani tamalaani maleruagassat isumaqatigiissutillu tamarmik naammassineqarsimanissaat qitiulluinnartoq Danmark aamma Kalaallit Nunaat isumaqatigiipput.

Illuatungeriit isumaqatigiissutigaaq Namminersorlutik Oqartussat ulloq 1. januar 2010 atuutilersumik aatsitassanut suliaassaqqarfik akisussaaffigileraat aammalu taamaalluni inatsisiliortuullutik ingerlatsisuullutillu kiisalu uranimik piiaaneq avammullu annissuineq nunanut allanut, illersornissamut sillimaniarnermullu politikkikkut ajornartorsiutitaqartoq.

Aatsitassanut suliaassaqqarfimmi nunanut allanut aalajangiisinnaatitaanerup

killissalersorneqarnera isumaqatigiinngissutigigatsigu, aammalu danskit naalackersuisuisa aamma Naalackersuisut akornanni suliassa qarfimmi siunissami suleqatigiinnissaq pillugu isumaqatigiissusiortoqartariaqartoq isumaqatigiissutigigatsigu, maannakkorpiaq suleqatigiinnerup qanoq inernejarnissaa aamma oqaatigisinnaanngilarput. Aamma suleqatigiinnissamut isumaqatigiissusiornermik suliaqarnerup naammassineqarnissaa sioqqullugu illuatungaannarsiorluni inerniliinernik nalunaaruteqaqattaarnissaq tulluassanngilaq.

12. Qaqugu paaasoqarsinnaalernissaanut piffissaq atorneqartussaq pillugu Cindy Vestergaardip naliliinerata aammalu piffissamik ukiunik marlunnik sivisunermilluunniit sivisussusilimmik atuinissaq pillugu Naalackersuisut naliliinerata akornanni akerleriittoqarpoq? Isumaqatigiissutit, inatsisit, maleruagassat il.il. sorliit isumaqatigiissutigineqassanersut atuutsinneqalissanersullu suli paasineqanngitsorlu aammalu nunami maani DK-milu oqartussaaffiit sorliit pisariaqartinneqarnersut suli paasineqanngitsorlu ukiut marluk-pingasut atorneqassasut qanoq ilillugu paasineqarpa? Aningaasartuutissallu aamma suli ilisimaneqanngillat. Allaffeqarfik akissuteqarnissaminut arriippallaartutut aatsitassarsiorfinnit uuliasiorfinnillu uparuartorneqareersaq suliamit tamatumangga qanoq artukkorsorneqartigissava?

Apeqqummut 12-mut akissut:

Naliliinermi Kalaallit Nunaanni aatsitassarsiorfinnik ingerlatsinermut maleruagassiinermut tunngatillugu misilittakkat inerisarneqarsimasut aallaavigineqarput. Tamatuma saniatigut nunani allani qanoq ingerlatsisoqarnersaq sapinngisamik annertunerpaamik isumassarsiorfigissallugu eqqarsaatigaarput. Maannakkuugallartoq missiliuineq pineqarpoq aammalu piffissap ingerlanissaa sivisunerusinnaavoq.

Aatsitassanut allaffissornikkut aqutsinermi isumalluutissat amerlineqarnissaat pisariaqartinneqartussaavoq. Isumalluutissanik pisariaqartitsinerup annertunerulernerata annertussusaa suliassanut aalajangersimasunut, akuersaanngilluinnarnissamik politikkeqarnerup atorunnaarsinneqarnissaa akuerineqassappat suliassaalertussanut ilaavoq.

14. Apeqqutip 14-ip immikkoortuata kingullersaanut aalajangersimasumik isummeqqullugit Naalackersuisut qinnuigineqarput (danskisuuani qupp. 10/12-imi qullerpaami oqaatigineqartoq)

Apeqqummut 14-mut akissut:

Najukkani inuttaasunik taasititsinissat pillugit apeqqutinut tunngatillugu, ilanngullugit inoqarfimmut qanissusaa, qaqugu Kalaallit Nunaata kujataani inuttaasunik taasititsinermik ingerlatsinissaq pilersaarutigineqarnersaq, taasititsinermi apeqqutit aalajangersimasut suussanersut, aammalu kikkut Nunami allanngutsaaliukkami peqarfut pillugit taasisanersut, ilisimatitsissutigineqassaaq taasititsinerup aalajangersimasumik

ilusilersorneqarnissaanut suli isummertoqanngimmat.

16. GME-p Australiami aningaasanik niuerfimmut nalunaarutaanik misissuinissaq Naalackersuisut pilersaarutigaat? Tassunga atatillugu GME-p akuersissutaa pillugu paasissutissanik Inatsisartunut nassitsiniarlutik Naalackersuisut siusinnerusukkut neriorsuutigisimammassuk ataatsimiititaliamit eqqaasitsissutigineqassaaq.

Apeqqummut 16-mut akissut:

GME-ip Australiami aningaasanut niuerfimmut nalunaaruteqarnerinik misissuinissamik Naalackersuisut pilersaaruteqanngillat.

Aatsitassanut qinngornernik ulorianartunik akulinnut tunngatillugu siusinnerusukkut Naalackersuisuusimasut piffissami naalackersuisuuffigisaanni akuersissutit tunniunneqarsimasut pillugit nassuiaat Naalackersuisut suliarileruttorpaat, ilanngullugu GME-mut akuersissut.

18. "Uranimik paaaneq avammullu annissuineq pillugu nalunaarusiap" teknikikkut Inatsisartunut nassuiaatiginissaa Naalackersuisut iluaqutaasutut isigissavaa? Danskite Folketingimut ilaasortaataannut nassuiaatip assigisaanik? (illersornissamut ataatsimiititaliaq, Kalaallit Nunaannut ataatsimiititaliaq aammalu nunanut allanut politikimut ataatsimiititaq teknikikkut nassuiaateqarfigineqareerput). Taakku ataatsimiititaliaapput annertuumik suliassaqarfiusut qitiusumillu inassisimasut, taamaattumik danskite naalackersuisuisa pisariaqavissutut isi-gisimavaat

Apeqqummut 18-imut akissut:

Uranimik paaaneq avammullu annissuineq pillugu Inatsisartunut nalunaarusiaq taaneqartoq akuersaannngilluinnarnissamik atorunnaarsitsinissap pillugu siunnersuummut aallaavigineqartoq Naalackersuisut isumaqanngillat. Taamaalilluni taamatut nassuiaateqarnissaq nukinginnartumik pisariaqartinneqanngilaq. Taamaattorli nalunaarusiaq akuersaannngilluinnarnissamik politikkeqarneq atorunnaarsinneqassappat maleruagassanik suleriaatsinillu aalajangersaanissaq aallartillugu suliaqarnissamut ingerlanneqartussamut iluaqutaasussaavoq pingaaruteqartumik. Suliaqarnermik taassuminnga aallartitsinermut Naalackersuisut nalunaarusiaq nassuiaatigalugu saqqummiisinnaapput.

Inussiarnersumik inuulluaqqusillunga

Jens-Erik Kirkegaard



Aatsitassanut Ataatsimiititaliaq

Uranimik pīaanissamik akuersaanngilluinnarnerup atorunnaarsinnissaa pillugu UKA13, imm. 106-imut tunngatillugu Aatsitassanut Ataatsimiititaliamit apeqqutit

18-10-2013
Sags nr.

Aatsitassanut Ataatsimiititaliaq ulloq 15. oktober 2013-imi ataatsimiinnermini makku apeqqutiginiarlugit aalajangerpoq:

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: isiin@nanoq.gl
www.nanoq.gl

1.

Uranimik pīaanissamik akuersaanngilluinnarnerup atorunnaarsinneqarnissaa pillugu tunngaviusumik aalajangiinissap akuerineqarnera ima kinguneqassasoq ilumoorpa:

- tamatuma kingorna aatsitassanik uranimik thoriumimillu akulinnik pīaanissamut qinnuteqaatinik akuerinninnissamut Naalakkersuisut inatsisitigut tunngavissinneqassasut?
- tamatuma kingorna uranimik thoriumimillu avammut tunisisinnaalertoqassasoq?
- tamatuma kingorna aatsitassat nunatsinni pīarneqarnissaannut akuersissutigineqarsinnaasussat raadiup qinnqornerinik qanoq akoqartigisinnaanannerannut imaluunniit qinnqornerinik qanoq annertutigisunik aniatitaqarsinnaaneranut qaffasinnerpaaffeerutissava?
- tamatuma kingorna uran imaluunniit thorium saniatigut tunisassiarineqarnissaat pingaarnertulluunniit tunisassiarineqarnissaat apeqqutaajunnaassasoq?

Akissut

Namminersornermut inatsimmi §§ 2-4-ni suliassa qarfiit tiguneqarnissaat pillugit maleruagassai naapertorlugit aatsitassanik suliassa qarfik Namminersorlutik Oqartussat tigusimavaat. Taamaalillutik tamanna pillugu namminersornermut inatsimmi § 1 naapertorlugu aatsitassanik suliassa qarfiup iluani Namminersorlutik Oqartussat inatsisiliornermik inatsisinillu atuutitsineramik (aqutsisoqarnermik) pissaaneqartuupput. Namminersornermut inatsisissatut siunnersuummi nalinginnarmik oqaaseqaatini aatsitassanik suliassa qarfik naatsumik imatut nassuiarneqarpoq:

"Aatsitassanik suliassa qarfik Kalaallit Nunaanni aatsitassanik misissuillunilu ujaasinermit tunngasuuvoq. Aatsitassat pineqarneranni isumalluutit

uumassuseqanngitsutut, aatsitassatut manngertutut kulbrintitullu iluseqartutut paasineqassapput.”

Aatsitassanik suliaasaqarfiup tiguneqarneratigut aatsitassanik suliaasaqarfimmi suliaqartoqarnermut nalinginnaasumik sinaakkutissanik, aammalu ilaatigut aatsitassanik nunap ataaniittunik misissueqqaarnernut, misissuinernut atuinernullu akuersissutitut ittunik aalajangiiffiginninnissamut Namminersorlutik Oqartussanut aalajangiisarnissaq tunniunneqarpoq.

Aatsitassanik suliaasaqarfiup tiguneqarneratigut aatsitassanik suliaasaqarfimmi Namminersorlutik Oqartussat inatsisiliornermik inatsisinillu atuutsitsineramik (aqutsisoqarnermik) pissaaneqartuupput, aatsitassanullu inatsit naapertorlugu Naalakkersuisut ilaatigut aatsitassanik suliaasaqarfimmi nalunaarutininik aalajangiisinnaapput, aammalu aatsitassanik misissueqqaarnernut, misissuinernut atuinernullu akuersissutinik nalunaaruteqarsinnaallutik.

Aammattaaq aatsitassanik suliaasaqarfimmi Namminersorlutik Oqartussat piginnaasaqarfiini kulbrintinik aatsitassanillu manngertunik tamanik, urani aatsitassallu radiop qinngornillit allat ilanngullugit, aammalu uranimik aatsitassanillu radiop qinngornilinnik allanik misissuillunilu atuinissamut Naalakkersuisut akuersissutinik nalunaaruteqarsinnaatitaanerat namminersornermut inatsisip malitsigisippai.

Aatsitassanik atuinermut akuersissummik nalunaaruteqarnissamut Naalakkersuisut piginnaaneqarfiat aamma aatsitassanik atugarisanik, ilanngullugit uranimik aatsitassanillu radiop qinngornilinnik allanik avammut tunisaqarnissamut akuersissummik nalunaaruteqarsinnaanermut piginnaasaqarnermik ilaqarneranik namminersornermut inatsimmuttaa q malitsigisitaavoq.

Uranimik avammut tunisineq nunani tamalaani inatsisaasunik, immikkut ittumik sakkussakilliliinermut siammarterissannginnermut tunngasunik siunertalimmik isumannaartumik uranimik piianeq isumagininnerlu isumannaarniarlugit isumaqatigiissutaasunik najoqqutassaqarpoq. Inatsisiliorneq tamanna soorunami najoqqutarineqassaaq, uranimillu thoriummimillu avammut tunisisoqartinnagu isumaqatigiissutit iliuuserisassallu tamarmik pisariaqartinneqarumaartut inissinneqartariaqarlutik.

Uranimik piiaanissamik akuersaanngilluinnarnermut politikki ujaasinermit atuinermullu sulianut akuersissutinullu tunngavoq, aatsitassanut akuutissanik

radiop qinngornitalinnik imarisai qinngornerit qaffasissusissaanit sinneqartunut tunngalluni. Uranimik qaffasissusissaq nalinginnaasoq granititut ujaraasunut 4-60 ppm-ip akornanniikkajuppoq. Uranimik piiaanissamik akuersaangilluinnarnerup atorunnaarsinnerani qaffasissusissatut qullerpaag taamaalilluni atorunnaarsissaag.

Immikkut ittunik piimasaqaatilinnik ujaasinissamut atuinissamullu akuersissutunik aatsitassanut inatsit najoqqutaralugu Naalackersuisut atugaqalersitsisinnaapput. Taamaalilluni akuersissutini ataasiakkaani aatsitassanik radiop qinngornilinnik akuerinartunik imalinnik aatsitassanut killissanik qaffasinnerpaanik Naalackersuisut aalajangersaanissaannut periarfissaqarpoq.

Uranimik piiaanissamik akuersaangilluinnarnermut politikkip atorunnaarsinnissaa Naalackersuisunut anguniagaavoq, taamaalilluni saviminissatut aatsitassaatsinnik qaqutigootunik atuinissamut aqut ammarneqassamat.

Kalaallit Nunaanni iluanaarniutigisassatut uraneqassutsinut ilisimaneqartunut tunngatillugu pineqartoq tassaavoq aatsitassanut qaqutigootorpianut uranip saniatigut tunisassiarineqarsinnaanera.

Uranimik piiaanissamik akuersaangilluinnarnerup atorunnaarsinneqarnera piviusunngortinneqassappat malittarisassianik ingerlatseriaatsinillu ilusilersuinissamut suliaasaq annertoq ingerlanneqartariaqassaaq, taamaalilluni urani isumannaatsumik isumagineqarlunilu nunani tamalaani isumaqatigiissutinut tamanut, uranip taamaallaat saassussinerunngitsunut siunertanut atugaanissanik isumannaarisussanut naapertuutsinneqassalluni.

Aatsaat ingerlassaq tamanna naammassineqarpat uranimik atuinissaq avammullu tunisinissaq pillugit qinnuteqaatinik piviusunik isummertoqarsinnaassaaq.

Pineqanngilaq maannakkorpiag aatsitassarsiornermik suliniutinik piviusunik akuersinissarput. Piffissarlu tamanna takkuppatt ilimanarpoq aatsitassarsiornermik suliniut uranip saniatigut tunisassiarineqarfigisassaa isummerfigineqassasoq.

2.

Uranimik pīaanissamik akuersaanngilluinnarnerup atorunnaarsinneqarnissaa pillugu tunngaviusumik aalajangerneq oqartussaasut maanna akisussaaffiannik allannguinaffiannitsoq Naalakkersuisunit uppersarnerqarsinnaava? Imatut paasillugu:
- aatsitassanik ujaasinissamut akuersissutinik pīaanissamullu akuersissutinik Naalakkersuisut siunissami kisimik aamma tunniussisassasut?
- aatsitassanik ujaasinissamut imaluunniit pīaanissamut akuersissutinik tunniussisoqannginnerani Inatsisartut aperineqartassanngitsut?

Akissut

Aatsitassanik suliassa qarfiup tiguneqarneratigut aatsitassanik suliassa qarfimmi Namminersorlutik Oqartussat inatsisiliornermik inatsisinillu atuutsitsinermik (aqutsisoqarnermik) pissaaneqartuupput, aatsitassanullu inatsit naapertorlugu Naalakkersuisut ilaatigut aatsitassanik suliassa qarfimmi nalunaarutinik aalajangiisinaapput, aammalu aatsitassanik misissueqqaarnernut, misissuineranut atuinernullu akuersissutinik nalunaaruteqarsinnaallutik.

Aammattaaq aatsitassanik suliassa qarfimmi Namminersorlutik Oqartussat piginnaasa qarfiini kulbrintinik aatsitassanillu manngertunik tamanik, urani aatsitassallu radiop qinngornillit allat ilanngullugit, aammalu uranimik aatsitassanillu radiop qinngornilinnik allanik misissuillunilu atuinissamut Naalakkersuisut akuersissutinik nalunaaruteqarsinnaatitaanerat namminersornermut inatsisip malitsigisippai.

Aatsitassanik atuinermut akuersissummik nalunaaruteqarnissamut Naalakkersuisut piginnaane qarfiat aamma aatsitassanik atugarisanik, ilanngullugit uranimik aatsitassanillu radiop qinngornilinnik allanik avammut tunisaqarnissamut akuersissummik nalunaaruteqarsinnaanermut piginnaasa qarnermik ilaqarneranik namminersornermut aamma aatsitassanut inatsisinnutaaq malitsigisitaavoq.

Inatsisit atuuttut naapertorlugit ujaasinissamut akuersissutinik aamma atuinissamut akuersissutinik Naalakkersuisut atugaqalersitsinissamut piginnaaneqartuussapput.

Piginnaanermik oqartussaasutullu suliqaarnermik immikkoortiterineq tamanna demokratii pillugu, oqartussaaso qarfiillu pingasut akornanni aqutsinermut

pissaaneqarnermut agguataarineq pillugu tunngavigisatut tunngavissanik malittarisassianillu tunngaveqarpoq.

Pissaanermik agguataarinerup, imaluunniit pissaanerup pingasunngorlugu avinneqarnerata nassatarai inatsisiliornermik pissaanerup inatsisartuniinnera, inatsisinillu atuutsitsinermik pissaanerup naalackersuisuniinnera, eqqartuussisutullu pissaanerup eqqartuussivinniinnera. Pissaanermik pingasunut avitsineq nunat ilaanni allagaasutut nunami naalackersuinerup aaqquussuussinermik, tunngaviusutut inatsisinik assingusutulluunniit inatsisinik malitassaqarput, nunanilu allani aqutseriaaseq tassanilu pissaanermik agguataarneq pillugu allagaanngitsunik, tunngavigisatut tunngavissanik, malittarisassianik imaluunniit isumaqatigiissutinik malitassaqarluni.

Qulaani pineqartumi Namminersorlutik Oqartussanut namminersornermut inatsimmi § 1 malittarineqarpoq. Suliassaqarfiit tigusimasat iluini Namminersorlutik Oqartussat inatsisiliornermik inatsisinillu atuutsitsinermik pissaaneqartuunerat taassuma aalajangerpaa, aammalu namminersortut pilersitaat eqqartuussiviit suliassaqarfiit tamaasa iluini Kalaallit Nunaanni eqqartuussisarnermik pissaaneqartuunerat. Aalajangersakkap nangillugu aalajangiuppaa inatsisiliornermik pissaanerup Inatsisartuniinnera, inatsisinik atuutsitsinermik pissaanerup Naalackersuisuniinnera, aammalu eqqartuussisutut pissaanerup eqqartuussivinniinnera.

Taamaattorli aatsitassanut inatsimmi § 4, imm. 3-mi aalajangersagaq naapertorlugu Naalackersuisut Inatsisartunik ilanngussissapput, tamatuma kingornatigut aalajangiisoqarneq sioqqullugu aatsitassanut ataatsimiititaliamut inuiaqatigiinnik imaluunniit avatangiisinik pingaarutilinnik sunniisinnaasunik pissutsit pillugit suliat pillugit Naalackersuisut ilisimatitsissallutik.

3.

Uranimik piiaanissamik akuersaangilluinnarnerup atorunnaarsinneqarnissaata akuersissutigineqarneratigut aatsitassanik raadiup qinngornerinik akulinnik passussinermut maleruaqqusanik sukannernerusunik tamatuma peqatigisaanik Inatsisartut piunasaqaateqanngitsut aammalu aatsitassanik raadiup qinngornerinik akulinnik passussineq eqqarsaatigalugu maleruagassanik siunissami sukaterisoqassanersoq annertusaasoqassanersorluunniit Naalackersuisunit taamaallaat aalajangerneqarsinnaasoq Naalackersuisunit uppersarneqarsinnaava?

Aatsitassat raadiup qinngornerinik akullit saniatigut imaluunniit

pingaarnertut tunisassiarineqarnersut apeqqutaatillugu oqartussat suliarinninnerat isumannaallisaatillu assigiinngissuteqassappat?

Akissut

Aatsitassanik radiop qinngornilinnik imalinnik atuinissamut akuersissummik nalunaaruteqartoqassatillugu aatsitassarsiornermut inatsit atuuttoq naapertorlugu piumasaqaatinik pisariaqartunik piumasaqaateqartoqassaaq, aammalu atuinermik suliarisaq avatangiisinut peqqissutsimullu tunngatillugu isumannaatsumik pisinnaaneranut iliuuserisassat pisariaqartut aalajangiunneqassallutik.

Aatsitassarsiorniviuup uranimillu kimittorsakkap tunisassiarinera aallartinnginneranni aatsitassarsiornermik ingerlatseqatigiiffik suliarisamik isumaginnittoq uppersaasannaassaaq ingerlatseqatigiiffiup suliarisani avatangiisinut tunngatillugu isumannaatsumik iluseqartillugu avatangiisinullu sunniutinik annikinnerpaasumik suliarineranik uppersaasannaassaaq. Sulianut pingaarutilinnut malittarisassiat atuuttut naapertorlugit VVM-imik nassuiaasiortoqassaaq (Vurdering af Virkning på Miljøet – Avatangiisinut Sunniutaasussanik Nalilersuineq). Aatsitassarsiornerup ingerlanneranut pilersaarutit suliniutip aallartinnginnerani Naalackersuisunit akuersissutigineqassapput.

Aatsitassaq pingaarnertut imaluunniit saniatigooralugu tunisassiarineqarluni piiarneqarnera apeqqutaatinnagu aatsitassanik pinngoqqaatinik radiop qinngornernik imalinnik piaanermut atasunik immikkut ittunik aarleqqutaasussanut pisariaqartitatut iliuuserisassat aalajangiiffigineqartariaqartassapput.

4.

Nunani tamalaani isumaqatigiissutit periutsinullu nassuiaatit nunani ataasiakkaani avatangiisitigut pissutsinut piumasaqaatinik imaqqanngitsut nunalli ataasiakkaat taakkuninnga suliarinniniarnerlutik namminneq aalajangersinnaagaat Naalackersuisunit uppersarneqarsinnaava? Aammalu uranimik piaanissamik akuersaanngilluinnarneq atorunnaarsinneqassappat avatangiisit illersorneqarnissaannut piumasaqaatinik nutaanik suliaqartoqarnissaa Naalackersuisunit naatsorsuutigineqanngitsoq pillugu siusinnerusukkut oqaatigisat, tassunga ilanngullugu avatangiisinik illersuinissaq eqqarsaatigalugu aatsitassanik raadiup qinngornerinik akulinnik piaanissamut immikkut ittumik piumasaqaatinik qulakkeerisussanik Aatsitassarsiornermut inatsimmi allannguutissanik pilersarusiortoqanngitsoq Naalackersuisunit uppersarneqarsinnaava? Piumasaqaatinik allanik

atuutsitsisoqalernissaa naatsorsuutigineqarpat taakku ataatsimiititaliamut erseqqissaatineqarnissaat qinnutigineqarpoq.

Akissut

Pinngoqqaatinik radiop qinnogornilinnik ujaasillunilu atuinnermut avatangiisinut inatsisilersuineq aatsitassanut inatsit aammalu taanna naapertorlugu aalajangersakkatut aalajangiussaasut najoqqutaralugu pingaarnertut pisarpoq. Aatsitassanut inatsimmi § 52, imm. 1 naapertorlugu pitsaanerpaatut suliarisartagaq naapertorlugu, aammalu teknikkimik pissarsiarineqarsinnaasumik pitsaanerpaamik atuinikkut suliat ingerlanneqassapput. Aatsitassanik radiop qinnogornitalinnik atuinissamut akuersissummik nalunaaruteqartoqassatillugu aatsitassanut inatsisaasut atuuttut naapertorlugit pisariaqartitanik piumasqaateqartoqassallunilu atuinnermik suliarisat atavangiisinut peqqissutsimullu tunngatillugit isumannaatsumik pisinnaanissaannut iliuseqarnissat aalajangiunneqassapput.

Uranimik aatsitassarsiorfimmu atillugu avatangiisinut tunngatillugit isumaliuutit aatsitassanik suliniutinut allanut atasutut isumaliuutaasunut annertuumik iluseqarlutik assingusuunerat, aammalu aatsitassarsiorfiup atuuffiani aqqusaakkat assigiingitsut avatangiisinut tunngasunik isumaliuutinut assigiinngitsunut tunngavissiiinnaanerit Australiami misissuinerit tikkuussipput. Aatsitassamik pinngoqqaatinik radiop qinnogornerinik imalimmik piiaanerup aallartinneqarnerani suliaqarfimmu malittarisassiassat aalajangersarneranni tamatuminngalu aqutsisoqarnerani misilittakkat nunani uranimik suliaqartutut ineriartorsimasuni Canadatut Australiatullu ittuni atorluaaniarnissaq pissusissamisuusaaq.

5.

Ullumikkut maleruagassat kingunerisaannik ujaasinissamut akuersissummik tunniussineq ingerlatseqatigiiffiup suliniummik ingerlataqartup piiaanissamik akuersissummik ingerlaannartumik tunineqarneranik kinguneqarnej ajortoq Naalackersuisunit uppersarneqarsinnaava? Taamatut periuseqarnermut tunuliaqutaasog itisileqqullugu Naalackersuisut qinnuigineqarput. Tamatuma saniatigut periutsip tamatuma allangortinneqarnissaa pilersaarutigineqarnerisog paasissutissiissutigeqqullugu Naalackersuisut qinnuigineqarput, taamaalilluni ujaasinissamut akuersissutinik tunniussineq piaanissamik kingusinnerusukkat akuersissuteqarfigineqarnissamut siunissami qulakkeerummik imaqartinneqalerluni.

Akissut

1991-imit aatsitassanut inatsimmiilli aatsitassanik inatsisiliornermut atatitsisutut tunngaviusimavoq pisinnaatitaaffeqartoq atuinissamut akuersissummik nalunaaruteqarfiginissaminut pisinnaatitaaffeqarnera, pisinnaatitaaffeqartup aatsitassanik aningaasarsiutigalugu atorneqarsinnaasunik takussutissiisimappat, aammalu imm. 1-imi piumasagaatit naapertuutsinneqarpata.

Taamaalilluni aatsitassanut paasisimasanut atuinissamik pisinnaatitaaffinnik nalunaaruteqarfiginissamut piumasagaatinik nalinginnangorsakkanik ujaasinissamut akuersissuteqarluni pisinnaatitaaffeqartoq pisinnaatitaaffeqartitaavoq. Ujaasinermini aningaasaliinerminut atuinissamut akuersissummik pisinnaatitaaffeqarnermigut pisinnaatitaaffeqartup iluaqutissarsinnaanissamut qularnaveeqquserneratigut aatsitassanik ujaasinermini aningaasaliinerit siuarsarnissaat tamatumunnga siunertaasimavoq.

Ujaasinermut akuersissutinut piumasagaatit nalinginnangorsakkani pineqarput aatsitassat tamarmik akuersissummi allamik nalunaartoqarsimasoqanngippat kulbrintit pinngoqqaatillu radiop qinngornitallit pinnagit.

Akuersissutinut piumasagaatini tapiliutit imatut oqaasertalik ilanngunneqarpoq:

709. Killissarititaasut immikkoortoq 101-mi taaneqartut iluanni tamakkiisumik pissarsiffiulluarsinnaasunik misissuinerup, avatangiisinut sunniutaasinnaasunik kiisalu inuiaqatigiinnit nammanneqarsinnaaneranik nalilersuinertallip, sularineqarnissaa siunertaralugu, aatsitassat misissoqqissaarneqarnissaannut atugassamik atortussiassat nalinginnaasumik radiup qinngornerinik akullit misissorneqarnissaannut qinnuteqaatinut AIP akuersissuteqarsinnaavoq. Piiariaatsimi, avatangiisitigut kiisalu isumannaallisaanertigut peqqinnissakkullu sunniutaasinnaasut, pinngoqqaatinut radiup qinngornerinik akoqarsinnaasunut attuumassuteqartut misissuinermini nalunaarusiornernilu taakkunani immikkut pingaartinneqassapput. Piffissami pilersaarutaasumik misissuinissat pillugit qinnuteqaat nassuiaatitaqassaaq, tassa immikkoortoq 710-mi allassimasoq naapertorlugu.
710. Immikkoortoq 709-mi misissuinissamut taaneqartumut akuersissut tunniunneqarnerminit ukioq ataaseq atuutissaaq. Piginnittussaataasup qinnuteqarneratigut piffissaq ukioq ataasiakkaarlugu sivitsorneqartarsinnaavoq, tassa immikkoortoq 1010-1002 naapertorlugu nalunaarusiamik, immikkoortoq 709 naapertorlugu immikkut ittumik misissukkat nassuiarneqarnerannik imalimmik, AIP tigusaqarsimassappat,

kiisalu akuersissuteqarnissamut piumasagaatit atuuttut allat malinneqarsimappata.

711. Immikkoortut 709-710 naapertorlugit akuersissut pinngoqqaatinik radiup qinngornerinik akulinnik misissuinissamut atuinissamullu akuerisaanerup nalunaarutigineqarnissaanut pisinnaatitsinngilaq.

Uranimik piiaanissamut akuersaangilluinnarnerup atorunnaarsinnerata nassatarinngilaa pinngoqqaatit radiop qinngornitallit atornissaannut akuersissummik ingerlaannartumik nalunaaruteqartoqartassanera. Tamanna pillugu qinnuteqaammut Naalakkersuisut isummersinnaanissaat sioqqullugu avammut tunisineramik nakkutilliisoqarfittut aaqqissuussamut, aammalu IAEA safeguardsit atuutsilernissaannut aaqqissuussamut inatsisiliornermut aqutsinermullu tunngasutigut sinnaakkutissat pilersinnissaat pisariaqarput. Tamakku saniatigut isumaqatigiissutitut ittunik nunani tamalaani pisussaaffinnut allanut pingaarutilinnut Kalaallit Nunaata aamma naapertuutsitsineranik isumannaarinissamik suliaqartoqassaaq. Taamaattumik danskini oqartussaasut aamma Namminersorlutik Oqartussat akornanni tamanna pillugu suleqatigiinnissamik isumaqatigiissuteqartoqassasoq naatsorsuutigineqarpoq.

6.

Akuersissutit (ujaasinissamik akuersissutit aamma piiaanissamik akuersissutit)

- katillugit qanoq amerlatigippat?
- qassit saniatigut qinngornernut qaffasissusissaq qaangerlugu uranimik imaluunniit thoriumimik akoqarpat?
- qassit aatsitassanik qaqutigoortunik akoqarpat?
- qassit saniatigut qinngornernut qaffasissusissaq qaangerlugu aatsitassanik qaqutigoortunik KIISALU uranimi aamma/imaluunniit thoriumimik akoqarpat?

Akissut

Kisermaassisinnaatitaaffitalinnik ingerlatseqatigiiffinnut ujaasinissamik akuersissutit naliginnaasut 79-it nalunaarutigisimapput. Maannakkut atuinissamik akuersissutit sisamaapput.

Aatsitassat radiop qinngornitallit:

Qaqqat ujaraanni kinnganinnguunnernilu sananeqaatit radiop qinngornitalit pissusissamisut nassaassaapput, imarisanilu peqartoqartuarpoq. Taamaalilluni aatsitassanik atuineq tamatigut sananeqaatinik radiop qinngornitalinnik minnerpaamik imaqartuassapput. Oqartussaasut suliaqarnerannut atatillugu sananeqaatit radiop qinngornitalit assigiimmik isigineqarneq ajorput. Pisoqarfiit assigiinnigitsut akornanni immikkoortiterisoqarpoq, soorlu: 1) piiarsimasami aatsitassani, 2) suliarineqarnerata kingornatigut aatsitassat kimittorsakkani, aamma 3) assersuutigalugu 'yellow-cake'-mut aatsitassat kimittorsakkat suliareqqinneranni.

Atortussanut radiop qinngornitalinnik paaanermut inerteqquteqarnerup attatiinnarnerani Kuannersuarni suliniummut erniinnaartumik nassataqartitsissaaq, aallartinnissamut periarfissaarutissammat. Ungasinnerusoq isigalugu (Killavaat Alannguat pinnagu) aatsitassanik qaqtigoortunik imalinnik aatsitassanut allanut aamma atuutilissaaq. Tamanna aamma aatsitassanut aarlerinartulinnut sunniuteqarfiussaaq, soorlu aatsitassanut niobiumimik tantalinillu imalinnik, qaqtiguunngitsukkut aatsitassanut radiop qinngornitalinnut assersuunneqartartunik, soorlu Motzfeldt Sømi aamma Sarfartumiittuni. Pinngooqaatinik radiop qinngornitalinnik (urani (U) aamma thorium (Th)) imaqarneri pissutigalugit aatsitassanut piviusunngortinneqarsinnaanngitsunut allattuiffik ataaniippoq:

Sumiiffik	Akuersissut	Aatsitassat radiop qinngornillit
Sarfartoq, Kitaa	Hudson Resources Inc.	1) Aatsitassat qaqtigoortut akuersaanngilluinnarneq sinnerlugu thoriummillit 2) Niobiumimik aatsitassat akuersaanngilluinnarneq sinnerlugu uranitaqarput
Kuannersuit, Kujataa Motzfeldt Sø / - / REE associated with the Ta-Nb deposit	Greenland Minerals & Energy Ltd. Ram Resources	Akuersaanngilluinnarneq sinnerlugu urani aamma thoriumi Aatsitassat qaqtigoortut, aamma niobiumitaqarlutillu tantalitalinnik aatsitassaqaarfik annertoq. Naleqassutsinik tutsuiginartunik tunisinissamut aatsitassat naammattumik misissorneqanngillat, aatsitassaniipulli urani aamma thoriumi. Akuersaanngilluinnarneq pissutigalugu ujaaseqqinnissamut tunuarsimaartoqarpoq.
Qaqaarsuk, Kitaani Kujataa	Nunaminerals	Akuersaanngilluinnarneq sinnerlugu thoriumi
Tikusaq, Kitaani Kujataa	Nunaminerals	Akuersaanngilluinnarneq sinnerlugu thoriumi
Niaq. Kitaa	Avannaa	Akuersaanngilluinnarneq sinnerlugu thoriumi
Milne Land, Tunu	CRGR	Akuersaanngilluinnarneq sinnerlugu thoriumi
Illorsuit, Kujataa	Akuersissuteqanng.	Uranimik aatsitassaqaarfik
Randbøldal, Tunu	Akuersissuteqanng.	Uranimik aatsitassaqaarfik
Attu, Nassuttoq, Puissattaq	Akuersissuteqanng.	Uranimik thoriumimillu periarfissalittut suliniutit

7.

Uranimik piiaanissamik akuersaanngilluinnarnerup atorunnaarsinneqarnissaanik siunnersuutip suliarineqarneranut atatillugu immikkut ilisimasallit kikkut Naalackersuisunit isumasiorneqarpat?

Akissut

UKA 13-imit atuutilersumik Uranimik aatsitassanillu radiop qinngornerinik qinngornilinnik allanik piiaanermut tunngatillugu "attueqqusinngilluinnarnek"-up atuukkunnaarnissaa Inatsisartut akuersissuteqarnissaat pillugu Inatsisartut aalajangiussinissaannut siunnersuut tassaavoq tunngavissatut politikkikkut aalajangiussinissaq. Siunnersuutip suliarinera sioqqullugu sammisaq pillugu ukiut arlerlugit kikkunnit tamanit oqallittoqarsimavoq, aammalu nalunaarusiani nassuiaatinilu arlalinni qaammarsaavigineqarsimalluni. Tamanna tunngavigalugu Naalackersuisut naalackersuisuunerminni salliusinnaatitaaffimminnik suliaqarput, aammalu politikkikkut iliuseqarnissaminnut pisinnaaffimminnik suliaqarlutik. Naalackersuisunut tunngavigisatut pisinnaatitaanerit taakku suliarinerisigut Naalackersuisut aatsaat immikkut ilisimasalinnik avataaneersunik siunnersortereernerup kingornatigut iliuseqarsinnaassappat demokratiskimik tunngavigisanut akerliussaaq.

8.

Uranimik piiaanissamik akuersaanngilluinnarnerup atorunnaarsinneqarnissaanik si-unnersuummut tunngavilersuummi immikkoortumi "innersuussineq"-rup ataani tulluanngitsumik oqaasertaliisoqarsimasoq Naalackersuisunit uppersarsarneqarsinnaava? Tassani Naalackersuisut oqaatigaat siunnersuut akuerineqassappat uranimik atortussiassanillu qinngornilinnik allanik uranip saniatigut tunisassiassatut akuuffigisaanik atuinissamut akuersissutit nalunaarutigisarnissaannut Naalackersuisut tunngavissaqalissasut. Qulequttami taasissutigineqartussami allassimangilaq saniatigut tunisassiaq imaluunniit pingaarnertut tunisassiaq pineqarnerisigut. Saniatigut tunisassiaralugu uranimik piiaanissamut taamaallaat akuersissuteqartoqartassasoq Naalackersuisut isumaqarpara Naalackersuisut tamanna pillugu allannguutissatut siunnersuummik saqqummiussisariaqassapput.

Akissut

Oqaasertaliinerup allaanerunissaa Naalackersuisut isumaqatiginngilaat. Ullumikkut uranimik paaanissamut akuersaanngilluinnarnermut politikki atorunnaarsittussaavoq. Tamanna allannguutissatut siunnersuummut angunigaavoq.

Aatsitassanut inatsit najoqqutaralugu immikkut ittunik piunasaqaateqarluni ujaasinissamut atuinissamullu akuersissutinik Naalackersuisut atugaqalersitsisinnaapput.

Uranimik paaanissamut akuersaanngilluinnarnerup politikkip atorunnaarsinnissaa Naalackersuisut anguniagaraat, taamaalilluni saffiugassatut aatsitassanik qaqutigootuutitsinnik annertuunik atuinissamut aqqu ammarneqassammat.

Kalaallit Nunaanni iluanaarutiginiakkatut uranitalittut aatsitassanut tunngatillugu tassaavoq aatsitassanut qaqutigortorpianut ilaasutut uranip saniatigut tunisassiarineqartarnissaata pineqarnera.

9.

Europami nunaniluunniit Euratomimik akuersisimasuni uranip akoqassusianut qaffasinnerpaaffissamut killiliisoqarsimanngitsoq Naalackersuisunit uppersarneqarsinnaava? Nunani taakkunani uranimik 1 %-imik akulimmik taamaallaat paaasoqarsinnaasoq urani pillugu oqallittoqarnerani isumaqartoqarpoq.

Akissut

Europami nunaniluunniit Euratomimik akuersisimasuni uranip akoqassusianut qaffasinnerpaaffissamut killiliisoqarsimannginneranik, aatsitassanik uranimik 1 %-imik akulimmik paaanissamik akuerinnittoqarsinnaatitsinngitsumik Naalackersuisunit uppersaasinnaapput.

10.

Uranimik paaanermi uranimillu avammut tuniniaanermi oqartussaaffik pillugu Danmarkip Kalaallit Nunaatalu akornanni aaqiagiinnginnerup kingunerisassai erseqqissumik nassuiaatigeqqullugit Naalackersuisut qinnuigineqarput. Uranimik paaanissatsinnut aamma/imaluunniit avammut tuniniaanissatsinnut Danmark pisortatigoortumik uagutsinnut inerteqquteqarsinnaava? Ataatsimiititaliap ilisimavaa taamaattoqarsinnaanngitsoq Naalackersuisut naliliisut (tak. § 37 akissut

2013-182). Danskilli naalagaaffiata Kalaallit Nunaanut inerteqquteqarsinnaanini aalajangiusimaannarpagu danskit kalaallillu tungaannit qanorpiaq iliuseqartoqassava aammalu suliap suliarineqarnerani uranimik suliniutit oqartussaasunit suliarineqarnerisa unitsinnissaanut Kalaallit Nunaat pisussaataassava?

Akissut:

Kalaallit Nunaanni uranimik piiasoqassaneranik aamma uranimik piiaanermut akuersissummik tunniussisinnanermik Naalackersuisut aalajangiussinissamut piginnaaneqartuusut isumaqatigiissutaavoq. Uranimik avammut tunisinermi piginnaasanik agguataarnermut tunngatillugu isumaqatigiittoqannginnerup kingunerisaa tassaavoq uranimik avammut tunisinermi piginnaasanik agguataarinissap qanoq ittuussanera pillugu Naalackersuisut aamma Danmarkip akornanni suleqatigiinnissamik isumaqatigiittoqassanera.

Danmarkip aamma Kalaallit Nunaata nunani tamalaani pisussaaffiit naapertuuttumik uranimik atuinerup pineranik nakkutilliinissamut isumannaarinissamullu aqutsisoqarnikkut aaqqissuussissummik pilersitsisoqarnera sioqqullugu uranimik suliniutit pillugit qinnuteqaatinik sunilluunniit akuerinnittoqarsinnaassanngilaq.

11.

Kalaallit Nunaat piffissami ungasinngitsumi nunarsuarmini uranimik avammut tuniniaasartut annerpaartaasa tallimat qulilluunniit akornanniilersinnaasoq Naalackersuisut Siulittaasuata Islandimi Arctic Circlep ataatsimeersuarnerani oqalugiarnermi oqarami nassaar sorsiaat eqqarsaatigai?

Akissut:

Naalackersuisut Siulittaasuata Kuannersuit isumaminiitippai. Kalaallit Nunaanni iluanaarutiginiakkatut uranimik aatsitassani Kuannersuit tassaapput aatsitassat qaqutigoortuutit atornerarnerinut atatillugu uranip isumagineqarsinnaaffigisassaat.

12.

Kalaallit Nunaanni isumaqatigiissutit attuumassuteqartut akuerineqarnissaannut, periutsinut nassuiaatit attuumassuteqartut suliarineqarnissaannut, nunat tamalaat akornanni isumaqatigiissutit eqqarsaatigalugit uranimik piaasinnaanissamut avammullu tuniniaasinnaanissamut aqutsinermik pisariaqartumik ineriartortitsisinnanissamut ukiut tallimanit qulinut ingerlasinnaasut

Cindy Vestergaardip DIIS-imeersup arlaleriarluni oqaatigaa:
- Naalackersuisut tamatumunnga qanoq oqaaseqaatissaqarpat?
- Taama isumaqarneq Naalackersuisunit isumaqatigineqarpa?
- Siuliani taaneqartut suliluunniit aaqqinneqanngitsut raadiup
qinngornerinik akulinnik suliniutinut piaanissamik akuersissutinik
tunniussisoqarsinnaassava?

Akissut:

Uranmik avammut tunisinermut, nunani tamalaani isumaqatigiissutinik
akuersissuteqarnermut aammalu uranisionermik misilittagalinnik nunanik
assigiinngitsunik oqaloqateqalernermet atatillugu piginnaasaqarfinnik
agguataarineq pillugu Danmarkilu suleqatigiinnissamik
isumaqatiginninniarnermik ingerlassap qanoq siviutiginissaa Naalackersuisunut
nalileruminaappoq. Ilaatigut suleqatigisatta qanoq piaartigisumik
periupeqassanerinik aalajangerneqassaaq. Naalackersuisut naliliinerannut
naleqqiullugu suliap ukiunik tallimanit qulinut siviutigissanera siviuneruvoq,
nunat allat misilittagaannik assut iluaquteqassallunilu aaqqissuussivitsinnut
naleqqussarlugit annertuumik assinganik suliaqassanerminnik Naalackersuisut
naatsorsuuteqarnerat pissutaalluni. Suliap ukiunik marlussunnik immaqalu
siviunerusumik sivissuseqassanera Naalackersuisut nalilerpaat.

Danmarkip aamma Kalaallit Nunaata nunani tamalaani pisussaaffiit
naapertuuttumik uranimik atuinerup pineranik nakkutilliinissamut
isumannaarinissamullu aqutsisoqarnikkut aaqqissuussissummik
pilersitsisoqarnera sioqqullugu uranimik suliniutit pillugit qinnuteqaatinik
sunilluunniit akuerinnittoqarsinnaassanngilaq.

13.

Kalaallit Nunaanni aatsitassanik raadiup qinngornerinik akulinnik
piiassoqarsinnaanera avammullu tuniniaasoqarsinnaanera
aalajangerneqassappat nunani ataasiakkaani nunanilu tamalaani
maleruagassat, inatsisit isumaqatigiissutillu sorliit
atuutsinneqalartariaqassappat? Maleruagassat malinneqassappata
suliffeqarfiit nakkutilliisoqarfiillu sorliit pilersinneqartariaqarlutillu
ingerlanneqartariaqassappat? Aamma tassunga atatillugu aningaasartuutit
qanoq amerlatigisut atorneqarnissaat Naalackersuisunit
naatsorsuutigineqarpa?

Akissut:

Tunngavissatut aalajangiussinissaq akuersissutigineqassappat apeqqutinik
taakkuninnga paasiniaaniarluni suliaq aallartisarneqartussavoq.

14.

Uranimik piaanissamik akuersaangilluinnarnerup atorunnaarsinneqarnissaa Inatsisartunit aalajangerneqarpat tamatuma kingorna innuttaasut peqataatinneqassasut Naalakkersuisut arlaleriarlutik oqaatigisarpaat. Innuttaasut taamatut peqataatinneqarnissaanni innuttaasut sumi najugaqarnersut apeqqutaassasoq pillugu aalajangiussartik Naalakkersuisut attatiinnarpaat? Tamanna ima paasillugu nunap sinnerani pinnani Narsami innuttaasut taasitinneqarnissaat ilimasaarutigineqarmat. Nunatta sinnerani innuttaasut qanoq peqataatinneqassappat? Naalakkersuisunit paasissutissat malillugit sumiiffiit 11-t uranisiorfittut ineriartortinneqarnissaannut piukkunnaateqarput. Najukkami innuttaasunik taasisitsinissami uraneqarfik najugaqarfinnut qanoq qanitsigissava? Naalakkersuisut Narsami innuttaasunik qaqugu taasisitsiniarpat taamaattoqassappallu apeqqut taasisutigineqartussa q suussava? Nunami eqqissisimatitami aatsitassat pillugit kikkut taasisinneqarsinnaassappat?

Akissut:

Innuttaasut annertuumik peqataatinnissaat Naalakkersuisut kissaatigaat. Uranimik atuinissamik akuersissutip nalunaarutiginnissaa pillugu qinnuteqaammut sumulluunniit piviusumik isummertoqarsinnaaneq sioqqullugu avatangiisinut aamma inuiaqatigiinnut tunngatillugu piujuartitsinermik misissuinerit ingerlanneqarsimassapput. Qinnuteqarnermik ingerlassami tusarniaanerit innuttaasunillu peqataatitsinerit sanioqqutassaangitsutut piumasagaatitit ilaassapput. Ingammik illoqarfinni nunaqarfinnilu sumiiffinni uranimik atuinissaq pillugu akuersissutinik qinnuteqarfiusuni innuttaasunut paasissutissiinermik sakkortusisamik iliuseqartoqassanera suliaqarfiusumillu innuttaasunik peqataatitsisoqassanera Naalakkersuisut piumasarissavaat.

Innuttaasunik taasisitsinermut tunngatillugu Kuannersuarnut tunngatillugu qinnuteqaataasinnaasoq pillugu aalajangiisoqartinnagu Kujataani najoqqutassiisumik taasisitsinerup piviusunngortinnissaanut Naalakkersuisut isumaliutigaat. Taasisitsinerup qanoq ililluni sumilu piviusunngortissanera pillugu Naalakkersuisut inaarutaasumik aalajangiussisimangillat.

15.

Kalaallit/danskit ataatsimut nalunaarusiaanni ilanngussaq 3-mi aatsitassat taaneqartut katitigaanerat Naalakkersuisunit qanoq ilisimasaqarfineqarpa? Aammalu aatsitassat taakkorpiaat nalunaarummi taaneqarsimanerannut suna tunngaviuva? Nalunaarummi ilanngussaq 10 innersuussutigalugu isumaqatigiissut nassuiaatigineqartoq atsiorneqassagaluarpat tamatuma kingunerisassai Naalakkersuisunit itisileqquneqarput.

Uranimik piiaanissamik akuersaanngilluinnarneq
atorunnaarsinneqassappat tamatuma kinguninngua
isumaqatigiissutip atsiorneqartussaana eqqorpa? Isumaqatigiissut
Namminersorlutik Oqartussanut allaffissornikkut
aningaasaqarnikkullu qanoq kinguneqassava?

Akissut:

Aatsitassat taakkorpiaat taaneqarnerannut patsisaasoq tassaavoq Kalaallit
Nunaanni uranimik aamma/imaluunniit uran-thoriumimik ilaqartutut
aatsitassaammata ilisimaneqartut.

Aatsitassat katitigaaneranni pinngoqqaatit sorliit ilaanersut takussutissiami
nalunaarsugaapput. Aatsitassat taaneqartut 2008-miilli sakkortuumik
oqallisigineqarsimapput, taamaattumik tassaapput aatsitassat nalunaarusianut,
atuagassaaqqanut, quppersakkanut, radiukkut tv-kkullu aallakaatitassianut
atatillugu tamanit ilisimaneqartuusut.

Ilanngussaq 10-mi nassuiaatigineqartutut isumaqatigiissutip nassatarissavaa
atomimik atuisoqarfimmi piginnaasaqassuseq pillugu
isumaqatigiissuteqannginnerup peerneqassanera. Isumaqatigiissut atorlugu
suliassaqarfimmi, uranimik imaluunniit thoriumimik aatsitassanik aammalu
taakkunanga tunisassianik suliaqarnermut tunngatillugu aatsitassarsionermik
ingerlatsinermit tunngatillugu namminersorlutik oqartussat suliassaqarfigisami
naalagaaffiup aamma namminersorlutik oqartussat akornanni siunissamut
piginnaasaqassanerat isumaqatigiissutigineqassaaq. Aatsitassanik radiop
qinngornilinnik aatsitassarsiorfinnik sanaartorlunilu ingerlatsinermit atatillugu
immikkoortillugit oqartussaasut suliaqarnissaasa pinaveernissaa
isumaqatigiissutip nassatarissavaa. Taamaalilluni danskit aamma kalaallit
oqartussaasoqarfiinit tamanit qaleriiaartunik akuersissutinik
pissarsiortariaqarnermik nassataqartitsisussaasumik ilungersunartumik
erseqqissuliutaanngitsoq peerneqassaaq.

16.

GME-p Kalaallit Nunaanni ingerlatani pillugit Australiamni aningaasanik
niuerfimmuut nalunaaruteqarsimanera pillugu Naalakkersuisut qanoq
paasissutissaateqarpat? Aammalu paasissutissat ilisimaneqartut qanoq
isummerfigineqarpat?

Akissut:

Australiami aningaasanik niuerfimmut GME-p nalunaaruteqarsimaneranik Naalackersuisut ilisimasaqanngillat.

17.

Uranimik piiaanissamik akuersaanngilluinnarnerup atorunnaarsinneqarnissaa Inatsisartunit akuerineqanngippat qanoq pisoqassava? Uranimik thoriumimillu piaanissaq aningaasaqarnitsinni pinngitsoorsinnaanngilarput?

Akissut:

Aalajangiussinisamut siunnersuut itigartitsissutaassappat malittarisassiornunilu suleqatigiinnissamik isumaqatiginninniarnermik suliarisat unissapput.

Aatsitassarsiorfiusup aallartinneqarnissaanik Kalaallit Nunaata aningaasaqarnera pisariaqartitsivoq. Aatsitassarsiornermik suliniutini iluatsitsisoqartarnera annikitsuvoq, pisariaqarporlu tamatigut suliniutinik ingerlassaqartuarnissaq, nunami aatsitassarsiorfiusumut tunngatillugu piginnaasanik sanaartugaqarnissaq attassiniarnerlu pillugit. Aatsitassarsiorfiusuni sulisartunut toqqaannartumik atuuppoq, aammali annertuumik aatsitassarsiorfiusunut sullississutinik nioqqutissanillu pilersuisoqarfiusunut. GME-p suliniutaa tassaavoq ingerlassarisaminni suliniutini siuarsimanerpaaq, suliniutinullu aallartinneqarsimanniganut ukiorpassuit atortariaqassapput GME-p maannakkut inissisimaffigisaanut anngunniarnermut.

18.


Uranimik piiaanissamik akuersaanngilluinnarnerup qaqugu atorunnaarsinneqarnissaa uranimik imaluunniit aatsitassanik allanik raadiup qinngorneranik akulinnik piiaanissamik qinnuteqaataasinnaasunik Naalackersuisut suliarinninerannut aalajangersimasunik sunniuteqassava? Aammalu uranimik piiaanissamik akuersaanngilluinnarnerup atorunnaarsinneqarnissaa pillugu aalajangernissaq ukiup affaanik ilivitsumilluunniit kinguartinneqarpat tamanna aalajangiisuusumik sunniuteqassava? Kinguartitsineq oqaloqatigiinnissamut innuttaasunillu akulerutsitsinissamut piffissaqarnerulersitsissasoq matumani eqqarsaatigineqarpoq.

Akissut:

Sioqqutsisumik suliamut aammalu aallareriikkamut tunngatillugu suliap ingerlanneqartuarnissaa annertuumik pingaaruteqarpoq. Danskik/kalaallit

ministereqarfiisa iluini uranimik pīaallunilu avammut tunisineq pillugu
nalunaarusiaata suliarineranut atatillugu inuppassuit ilanngunneqarsimapput.
Aqutsinikkut inatsisiliornermullu tunngasunik aaqqissuussivimmik
suliaqarnermik suliap ingerlateqqinnissaa tulluartaavoq, tassalu inuit taakku
akulerusimaneranni aammalu siusinnerusukkut oqallinnerit
eqqaamaneqarneranni.

Inussiarnersumik inuulluaqqusillunga



Jens-Erik Kirkegaard